


廣寧縣鄉土志

地(10.17)
539



圖書館

序

昔王儉見任昉所集史論三復殷勤以爲當今無此輩吾於蕭君沛三所著廣邑鄉土志抑謂之以篇什所采言簡而明詞卓而精有龍門手筆非夫李百藥之撰北齊書徒尙麗艷已也篇中至精約者地理區域城池名山河源寺觀道路分叙處尤爲簡當推究已然是必番僧所賫葫蘆中漢書傳叙盡爲宣城太守蕭琛所得故爾文筆蒼古如此是冊若傳吾當謂爲班固真本時

光緒丁未清和望日適余奉檄宰守廣邑案牘紛勞之餘檢讀一過未敢妄加議言特以奇文之觀人共欣賞因叙其美以質後鑒當必以余言爲不謬

廣甯縣鄉土志

海琴弟楊昌瀚叙

年志同卷

廣甯鄉土志編輯歲事客有造校而請者曰竊聞邦國繫世掌之小史都鄙封域責在職方鄉土之有志自古章章矣厥後志靈壽者陸紀武功者康固已名篇踵起分道鑣揚而未逮我 沛翁蕭君之撰述有以躋史家之裁而登作者之堂也觀其摭軼聞之湮墜追前哲與頡頏非所謂備九能而擅三長者乎余曰唯唯 蕭君之所蘊負者蓋有莫殫之望無盡之藏而匪第侈淹雅於杜庫曹倉也君以爲考古遺今者按圖所以失驥也務外輕內者歧路所以亡羊也世之殫研地志者目營八極精鶩四荒九域志徵諸南宋十洲記考於東方誓將追探險家之哥倫布受縮地術於費長房蓋瀛裨窮八十一州之奧而禮俗括三

十六國之詳及反而稽閭史討朝章口繹而語塞舌橋而目瞠問瑯琊者羞貽刈稻田首山者誤認翳桑甚至幅員之不悉疆域之若茫野人山本腹地而反詢外族巨文島非拳石而劃出重洋鄰國因而齒冷局外於以心傷目不見睫幾見其心之不盲耶夫數典者尊其祖觀化者始於鄉吾廣邑古稱險瀆夙號巖疆陪都舒其臂遼右搯其吭固所以拱岐嶽鳳鳴之地而拓真人龍戰之場者也百數十里之版宇二百餘載之星霜鬱鬱蒼蒼雲氣固猶飛於芒碭耳今者報德之維已固圖們之水不揚邦之人亟宜起而修警備厲農商敷文化繕武裝顧乃筋弛骨惰酣嬉徜徉地多棄貨戶抄蓋藏譬之賈欲贏而小販無從博其

利炊無米而巧婦不得盡其長智之不濬謀其奚臧豈非
圖籍乏鄮侯之博而史筆遜董氏之良歟而此一編也鎔
里乘之模範導後學以津梁蒐遺文而徵先獻綜細目而
舉宏綱使讀之者鏗而不舍奮而爭強行見材俊於是出
治具於是張必且有度地理財之仲父墾田教戰之商鞅
發政治思想爲里街輝光豈但與傳耆舊誌風土者較其
秒忽絜其短長也哉客旣退爰筆以爲之序

廣甯公學堂正教員蕭懷錦拜撰

六朝小品

乙巳仲冬奉 學務處委充廣甯公學堂教員到堂後日
與 沛公堂長晤談今閱三學期 沛公之性情心術言
論丰采吾無間然其淡泊自甘不汲汲於求仕是晉之嵇
中散唐之韋蘇州也其優容相與不察察以爲明是宋之
韓魏公漢之黃叔度也其待教員也忠且敬雖習見而禮
貌弗衰其待生徒也峻而嚴有微失便譴呵不宥其御夫
役也不賞而勸不怒而威殆所謂易事難悅之君子也丁
未春初 提學憲札催廣甯公學堂編撰本境鄉土志
沛公遵卽面囑煥章教員代庖煥章堅辭弗任 沛公不
獲已乃依 學部頒示例目觸類引伸不數日而告成凡
城池區域山河道里莫不指陳確切考覈詳明捧讀迴環

瞭如指掌此書一出適足以嘉惠後生客歲 趙制軍獎
給心殷教育匾額洵無愧也且本堂規模齊整院宇宏深
當興辦之初賴 沛公衆望所歸諸紳富乃踴躍捐輸成
斯廣廈是創設學堂非 沛公之力不至此茲復苦心孤
詣編輯鄉土志一書寔與建學之功相表裏人有善舉不
可沒滅弗彰^甲相處日久知之最真歷叙其事以示傾慕
不置云 教員孫南甲謹誌

未正公傳

天下事繼成則易創始實難卽著書亦何莫不然廣邑向無志書而奉天一省溯自唐虞而後半屬戎狄商周爲肅慎氏國漢爲燕人王滿所據晉爲慕容氏都唐隸渤海郡未幾地屬契丹至有宋一代卒莫能復明爲遼東置衛設州後永樂七年以山海關內隸京師而全遼之地遂廢是以古來圖書皆略而不載 沛三夫子嘗謂學問之道大抵由近以及遠由卑以登高將欲明天下之形勢者必自本邑始於是遍探古今實錄凡有關於人心風俗者莫不縷晰條分其紀城池村鎮也如李吉甫之元和郡縣志也其詳道里疆域也如張博望之指陳西域形勢也其論山脈水源也如徐霞客之分南龍北龍也至於先賢世族人

物名稱則仿龍門傳贊例詞簡而意該文約而事博煌煌乎不朽之偉業也昔陽翟大賈著呂氏春秋懸之國門謂有人易一字予以千金卒無能易之者 受業 謂此書若出亦當如是故不禁抒此欽佩之情謹爲之叙云

受業李雨春拜撰

之序大方

養光明齋主人自序

廣甯向無志書故凡道路井疆城池村落山川形勢人物名稱雖縱橫不過百里之遙有難以一一悉數者况名宦鄉賢流風善政半皆沒滅弗彰此誠邑人士之缺憾也光緒三十二年 學部通飭各省府廳州縣編撰鄉土志一書定爲初等小學課本三十三年三月廣甯縣松大令馨山奉 提學憲札催編纂松大令卽委其責於予予不敢登作者之堂轉請教員蕭煥章代庖煥章固辭亦不以作者自任予不自揣遂博采羣書摭拾古人傳述調查時務臚陳本境規模痰喘餘生勉強從事因松令催促甚迫僅十餘日卽草創成書時值楊大令海琴接署廣甯縣事將

所編鄉土志轉呈 提學憲當因體裁不合札飭另作楊大令徧請學界中人增刪補綴終無一人承任其艱仍委其責於予予却之不恭任之滋愧不得已竟復爲馮婦書成仍經 提學憲以簡略批駁札飭廣甯縣楊大令延聘通才另爲編集予聆批之下無地自容然而兩番記載煞費苦心旣成落卷不得列入官書擬付梓人尙可傳爲家乘惟諸公序詞獎飾太過撫心自問愧不敢當時光緒三十四年首夏養光明齋主人蕭雨春自序見此書者如不竊笑是則予之大幸也夫

鄉土志目

廣甯歷史

政績錄

兵事錄

耆舊錄

人類

戶口

氏族

宗教

實業

地理

廣甯縣鄉土志

區域

山

水

道路

物產

商務

廣甯歷史



廣甯縣城因明季廣甯路舊址修築週圍二十里門
五南曰迎恩小南曰泰安西曰拱鎮北曰靖遠東曰
永安伊古以來建置沿革其大略可枚舉焉

唐屬禹貢冀州之域

虞屬幽州

夏屬冀州

商 同

周屬幽州初爲朝鮮界後屬燕

秦屬遼西郡統於遼東

西漢時東南爲無慮望平二縣屬遼東西北屬遼西

東漢時無慮縣地爲遼屬國望平縣屬遼東郡後屬
烏相

三國時北魏無慮望平二縣并屬遼東郡

晉望平縣屬元菟郡隸平州省無慮縣

南北朝後魏望平縣太武帝時省入廣郡縣

隋屬高麗

唐平高麗於無慮望平二縣置巫閭守尉都護府後
入渤海爲顯德府

遼世祖時以渤海顯德府地置顯州奉先軍領奉先
山東歸義三縣屬東京又置奉陵縣屬乾州按遼志
奉先縣本漢無慮縣山東縣本漢望平縣奉陵縣亦

漢無慮縣地無慮卽巫閭古名醫無慮

金奉先山東奉陵三縣太宗時改奉先爲鍾秀縣奉陵爲閭陽縣山東爲廣甯縣又置望平縣並屬顯州爲廣甯府領廣甯望平閭陽鍾秀四縣

元鍾秀閭陽望平三縣世祖時省鍾秀縣入望平縣並閭陽縣屬廣甯府路

明洪武二十三年置廣寧衛盡廢州縣二十五年封建遼王改廣寧中護衛次年復改廣寧衛統中左右三衛永樂時又徙廣寧中左右三衛於此并屬遼東都指揮使

國朝康熙三年設廣寧府并廣寧縣四年裁府以縣隸

錦州府十五年設巡檢司於義州屬廣寧縣雍正二年分錦府通判駐義州移巡檢司於天橋廠自此以後義州境非廣甯所屬光緒二十八年分廣甯東北界爲鎮安縣三十一年分廣甯東南界爲盤山廳

政績錄

遼

馬人望

字儼叔遼東醫巫閭山人祖淵中京副留守父詮中京文思使人望由進士爲松山縣令時歲運澤州官炭獨役松山人望請於中京留守蕭吐渾均役他邑調涿州新城縣吏民畏愛擢中京度支司鹽鐵判官轉南京三司度支判官公私兼裕遷警巡使京城獄訟填委人望剖決無一冤者會檢括戶口未兩旬而畢同知留守蕭保先問故人望曰民產若括之無遺他日必滋厚歛之弊大率十得六七足矣保先曰公

慮遠吾不及也拜參知政事南院樞密使人不敢干以私用人必公議所當與者如曹勇義虞仲文人望推薦皆爲名臣時民所甚患如駟遞馬牛旗鼓鄉正廳隸倉司之役至破產不能給人望使人出錢官自募役時以爲便卒謚文獻人望有操守喜怒不形未嘗附麗求進初除執政人賀之人望愀然曰得勿喜失勿憂抗之甚高擠之必酷其畏慎如此

金

盧孝儉

宣德州人登進士官太原少尹大定中川廉進官二階遷同知廣寧尹廣甯大饑民多流亡孝儉設法賑

濟全活甚衆

元

郭嘉

字元禮濮陽人泰定進士會擇守令縷靖遼東授嘉廣甯路總管兼諸奧魯勸農防禦屬盜起軍旅數興民苦轉輸吏胥復因時爲奸嘉設法計其戶口第其甲乙民甚便之詔團結義兵嘉募民數千教以坐作進退號令齊賞罰信故東方諸郡錢糧之富甲兵之精稱嘉爲最十八年寇陷上京嘉聞之躬率義兵出禦旣而遼陽陷賊勢日熾孤城無援嘉竭家所有財物犒義勇誓以死守頃之賊至圍城亘數十里有呼

於城下者曰遼陽我得矣何不降嘉一矢斃之賊稍引退嘉遂開西門逐賊賊大至嘉力戰死贈崇化宣力效忠公臣封大原郡公諡忠烈

明

劉江

永樂中鎮守遼東巡視諸島相地形勢請於金州衛之望海塢築城堡立烟墩一日瞭望報海寇將至江令犒師秣馬意態安閑伏兵山下遣壯士潛燒賊船截其歸路乃與衆約曰旗舉砲鳴伏兵奮擊不用命者軍法從事旣而賊至伏兵盡起兩翼並進賊兵大敗奔櫻桃園空堡將士請入堡勦殺江合圍而缺其

西壁仍令兩翼夾攻擒斬無遺自是海寇不敢犯遼
論功封廣寧伯及廣寧侯

王祥

固始人以都指揮僉事任廣寧修築寧遠蒲河等城
恤下興學頗多善政

巫凱

句容人幼穎異七歲賦牡丹詩十九代父百戶職累
功陞遼東都指揮使宣德間陞左軍都督僉事展廣
寧城奏設寧遠衛尋陞都督同知

劉英

蘇州崇明人性孝友簡靜寡言不事矯飾由廣寧指

揮使累功陞都指揮使管遼東都司事歷任既久廉
能益著後以年老休致遼人攀轅留之

周斯盛

西寧人癸丑進士嘉靖時巡按遼東是年暑雨數月
禾盡湮沒軍民饑甚亟開倉賑給不足復索之庫得
贖金併可貸者萬餘兩訪素有積粟者量予之金俾
出穀平糶猶不足上疏求賑更發帑金全活甚衆土
寇犯廣寧斯盛身先士卒戰六晝夜卒有安定之功

兵事錄

按明改元制設立屯衛所有廣甯左屯衛廣甯右屯衛廣甯前屯衛廣甯後屯衛廣甯中屯衛後又增設廣甯中前千戶所廣甯中後千戶所廣甯中左千戶所

嘉靖十四年遼東軍變後遂平定然漏網者衆悍卒無所憚未幾廣甯卒佟伏張鑑等乘旱饑倡衆爲亂是時馬永爲遼東總兵官駐廣甯諸營憚永威無應者伏鑑等登譙樓鳴鼓大噪永率家衆合攻千戶張斌被殺永戰益力盡殲之

隆慶九年正月塞外土蠻糾合諸部聚兵塞下謀入

廣甯是時遼東總兵李成梁駐廣甯聞之帥輕騎從大甯堡出遇於塗大戰自辰迄未敵不支敗走十月又糾合速把孩等十餘萬騎攻圍廣甯成梁禦却之轉掠盤山驛及十三山驛而去

萬曆二十二年塞外西部卜言台周合衆十餘萬聲犯廣甯總兵董一元遣副將孫守康馳右屯禦之無何卜言台周至右屯攻圍五日夜守廉等固守乃引去時巡撫李化龍慮歲晏不備爲寇所乘乃留弱卒守廣甯而自率精騎西巡以疑寇

天啓二年擢王化貞爲巡撫駐廣甯是時我兵已克遼瀋將進逼西平堡化貞提弱卒千餘守孤城氣不

懾時望赫然未幾又拜熊廷弼爲經略朝議亦命赴
廣甯而二人意見不合化貞主進取廷弼主固守廣
甯會我兵已攻西平堡化貞信其中軍孫得功言盡
發廣甯兵赴援得功至西平堡遂降欲生縛化貞返
詭言敵兵已薄城城中大亂化貞不知所出遂棄廣
甯徒步踉蹌走與廷弼遇於閭陽驛

耆舊錄

遼

耶律良

字習撚生於乾州讀書醫巫閭山重熙中補起居注清甯中上幸鴨子河作捕魚賦遷知制誥兼知部署司事奏請編御製詩文曰曰清甯集上命良詩爲慶會集親製其序重元謀亂良發其事以功遷漢人行宮都部署咸雍初同知南院樞密使

金

馬知剛

廣寧人仕至鳳翔府尹有詩名

元

耶律楚材

耶律楚材字晉卿遼東丹王突欲八世孫父履以學行事金世宗特見親任終尙書右丞楚材生三歲而孤母楊氏教之學及長博極羣書旁通天文地理律歷術數及釋老醫卜之說下筆爲文若宿構者金制宰相子例試補省掾楚材欲試進士科章宗詔如舊制問以疑獄數事時同試者十七人楚材所對獨優遂辟爲掾後仕爲開州同知貞祐二年宣宗遷汴完顏復興行中書事留守燕辟爲左右司員外郎太祖至燕聞其名召見之楚材身長八尺美髯宏聲帝偉

之曰遼金世讎朕爲汝雪之對曰臣父祖嘗委質事之既爲之臣敢讎君耶帝重其言處之左右遂呼楚材曰吾圖撒合里而不名吾圖撒合里蓋國語長髯人也己卯夏六月帝西討回回國禡旗之日雨雪三尺帝疑之楚材曰元冥之氣見於盛夏克敵之徵也庚辰冬大雷復問之對曰回回國主當死於野後皆驗楚材蒞官宰相有譖楚材者言其在相位日久天下貢賦半入其家命近臣麻里札覆視之惟琴劍書畫金石遺文數千卷至順元年贈經國議制寅亮佐運功臣太師上柱國追封廣寧王諡文正

明

賀欽

其先定海人因戍家廣寧成進士聞陳白沙先生議論卽執弟子禮授戶科給事中直言敢諫嘗書鄙夫章於壁以自儆成化四年以疾歸欽不務博覽靜思默識反身實踐每教人讀白鹿洞教條嚴爲己爲人之辨宏治改元大臣交薦授陝西左參議以母老固辭且陳四事一曰資眞儒以講聖學二曰薦賢才以輔治道三曰遵祖訓以處內官四曰興禮樂以化天下其云處內官者指王振曹吉祥汪直梁芳輩陷君誤國蠹政殃民內不可使預大政外不可使掌兵權尤爲切要疏入報聞欽讀書之暇釣游凌谿徜徉自